


## PETER, JOHN ('Ioan Pedr'; 1833 - 1877), gweinidog ac athro Annibynnol, ac ysgolhaig Cymraeg



**Enw:** John Peter  
**Ffugenw:** Ioan Pedr  
**Dyddiad geni:** 1833  
**Dyddiad marw:** 1877  
**Priod:** Elizabeth Peter (née Noall)  
**Rhiant:** Ellen Jones  
**Rhiant:** Peter Jones  
**Rhyw:** Gwryw  
**Galwedigaeth:** gweinidog ac athro Annibynnol, ac ysgolhaig Cymraeg  
**Maes gweithgaredd:** Crefydd; Addysg; Ysgolheictod ac Ieithoedd  
**Awdur:** Robert Thomas Jenkins

Ganwyd yn y Bala, 10 Ebrill 1833, yn fab i Peter Jones, saer melinau, a'i wraig Ellen. Bu yn ysgol rad y Bala ('Ysgol Tytandomen'), ond yn 1847 dechreuodd weithio fel saer melinau. Yn ei drampiau ar draws gwlad, cafodd gyfle i'w ddiddordeb mewn daeareg ac mewn hynafiaethau. Ymddiddorai hefyd mewn barddoniaeth, ac yn 1849 sefydlodd ef a'i gyfeillion (megis **Thomas Charles Edwards**) ' Gymdeithas Lenyddol Penllyn '; ymroes hefyd i'w ddiwyllio ei hunan gan astudio ieithoedd ac ymweld ddwywaith (1856, 1857) â'r Cyfandir. Dechreuodd bregethu; ym Medi 1855 aeth i Goleg yr Annibynwyr yn y Bala; ac yn 1859 codwyd ef yn athro ynddo. O 1859 hyd 1870 bu'n weinidog cynulleidfaoedd y Bala a Thy'n-y-bont. Priododd yn 1861 ag Elisabeth Noall, merch o gryn allu y gwelir peth o'i gwaith yn *Y Traethodydd*, 1864 a 1869. Bu farw 17 Ionawr 1877. Yr oedd yn llenor cyffredinol diwyd; sgrifennai i'r *Beirniad*, *Y Diwygiwr*, *Y Dysgedydd*, a'r *Traethodydd*, nid yn anaml ar wyddoniaeth - yr oedd yn ddaearegwr da. Ond ar y Gymraeg a'i llenyddiaeth y gwnaeth ei waith pwysicaf. Copïai lawysgrifau 'n ddyfal, ac yr oedd yn llyfryddwr gwych. Eithr hynodid ef yn bennaf gan ei astudiaeth wyddonol o'r iaith; disgybl oedd ef i **Edward Lhuyd**, a chyfaill i wyr fel **Thomas Stephens** a **Daniel Silvan Evans** a **John Rhys** yn y wlad hon, a Gaidoz a Schuchardt ar y Cyfandir - ymwelodd y ddau ag ef yn y Bala. Pan gychwynnwyd *Y Cymmrodor*, yr oedd 'Ioan Pedr' yn un o'i olygyddion, ac ymddangosodd peth o'i waith ynddo ac yn y *Revue Celtique*. Y mae ei lawysgrifau bellach mewn rhan yn y Llyfrgell Genedlaethol ac mewn rhan yn Llyfrgell Coleg y Gogledd.

### Awdur

**Yr Athro Emeritus Robert Thomas Jenkins**, (1881 - 1969)

### Ffynonellau

*Journal of the Welsh Bibliographical Society*, iv, 4 (Rhagfyr 1933), gyda llyfryddiaeth a darlun

### Delweddau

Hugh Humphreys, *Ioan Pedr*

LIGC: *John Peter*, 'Ioan Pedr'

### Gweithiau

Morgan Llwyd, John Peter, *Can anghyhoeddedig o waith Morgan Llwyd o Wynedd, yn nghyda byr nodiadau ar ei fywyd a'i weithiau*(Bala 1875)

### Dolenni Ychwanegol

VIAF: 78275890

Wikidata: Q28361339

Dyddiad cyhoeddi: 1953

Hawlfraint Erthygl: <http://rightsstatements.org/page/InC/1.0/>

PDF Argraffu Cyfeirnod

Mae'r Bywgraffiadur Cymreig yn cael ei ddarparu gan Lyfrgell Genedlaethol Cymru a Chanolfan Uwchefrydiau Cymreig a Cheltaidd Prifysgol Cymru. Mae ar gael am ddim ac nid yw'n derbyn cymorth grant. Byddai cyfraniad ariannol yn ein helpu i gynnal a gwella'r wefan er mwyn i ni fedru parhau i gydnabod Cymry sydd wedi gwneud cyfraniad nodedig i fywyd yng Nghymru a thu hwnt.

Ewch i'n tudalen codi arian am ragor o wybodaeth.



Arddull APA



Jenkins, R. T., (1953). PETER, JOHN ('Ioan Pedr'; 1833 - 1877), gweinidog ac athro Annibynnol, ac ysgolhaig Cymraeg. Y Bywgraffiadur Cymreig. Adferwyd 12 Hyd 2024, o <https://bywgraffiadur.cymru/article/c-PETE-JOH-1833>

Y Bywgraffiadur

Preifatrwydd a Chwciis  
Hawlfraint  
Y Prosiect  
Cymorth  
Cysylltu

LGC  
NLW

LLYFRGELL  
THE NATION



Wedi'i darparu gan  
Llywodraeth Cymru  
Sponsored by  
Welsh Government